

U ovom broju, između ostalog, čitajte:

- **ZD PSBiH usvojio Prijedlog zakona za pomjeranje roka plaćanja PDV-a, po inicijativi UPFBiH**
- **UPFBiH od delegata Doma naroda PSBiH traži da podrže Prijedlog Zakona o PDV-u**
- **UPFBiH: U FBiH blokirano više stotina miliona KM jer Dom naroda FBiH nije imenovao članove Komisije za vrijednosne papire FBiH**
- **ZD PSBiH prihvatio inicijativu UPFBiH za ukidanje obaveze plaćanja akcize na denaturirani etil alkohol**
- **IO UPFBiH: Hitno donijeti izmjene i dopune Zakona o radu FBiH i novi set mjera za pomoć privredi nakon krize**
- **UPFBiH pozvalo bh. vlasti da hitno stvore uvjete koji će omogućiti službena putovanja u i iz BiH**
- **Izmijenjen Pravilnik o izmjeni i dopuni pravilnika o registriranju vozila**
- **UPFBiH poziva banke da ne povećavaju kamate privrednim društvima**



ZD PSBiH usvojio Prijedlog zakona za pomjeranje roka plaćanja PDV-a

Zastupnički dom Parlamentarne skupštine Bosne i Hercegovine je na sjednici održanoj 20. maja 2020. godine prihvatio inicijativu Udruženja poslodavaca FBiH za pomjeranje roka plaćanja PDV-a sa 10. na posljednji dan u mjesecu. Po hitnom postupku je usvojen Prijedlog zakona o dopuni Zakona o porezu na dodanu vrijednost, po prijedlogu zastupnika Denisa Zvizdića, te usvojen zaključak

da se ovaj Prijedlog zakona dostavlja Domu naroda PSBiH uz zahtjev da se isti razmatra po hitnom zakonodavnom postupku.

Prijedlog zakon predviđa dodavanje novog člana (Član 39a.) prema kojem "Vijeće ministara BiH može, s ciljem ublažavanja efekata ekonomske krize i drugih poremećaja u ekonomiji Bosne i Hercegovine, donijeti privremenu odluku o pomjeranju roka za podnošenje prijave za plaćanje PDV-a iz člana 39. stav (2) ovog zakona, do posljednjeg radnog dana u mjesecu, na period koji ne može biti duži od 90 dana. U slučaju potrebe, Vijeće ministara BiH može produžiti rok iz stava (1) ovog člana na dodatnih 90 dana".

Dom je, također, usvojio i zaključak kojim zadužuje Vijeće ministara BiH da u roku od 90 dana izradi i Zastupničkom domu PSBiH dostavi na raspravu Prijedlog izmjena i dopuna Zakona o porezu na dodanu vrijednost na način da se obaveznicima plaćanja PDV-a omogući podnošenje mjesečne PDV prijave do kraja mjeseca po isteku poreskog perioda, odnosno da se postojeći stav (2) člana 39. Zakona o porezu na dodanu vrijednost izmijeni i glasi: „Prijavu iz stava 1. ovog člana obaveznik podnosi do kraja mjeseca po isteku poreskog perioda".



UPFBiH od delegata Doma naroda Parlamenta BiH traži da podrže produženje roka za podnošenje prijave i plaćanje PDV-a

Udruženje poslodavaca FBiH zatražilo je 27. maja 2020, godine od delegata Doma naroda Parlamentarne skupštine BiH da podrže izmjene i dopune Zakona o porezu na dodanu vrijednost BiH, u smislu produženja roka za podnošenje prijave i plaćanje PDV-a, a koje je ranije usvojio Zastupnički dom Parlamentarne skupštine BiH. Sjednica Doma naroda održat će se 28. maja 2020. godine.

Radi se o zahtjevu koji je potpisalo više od 30.000 poslovnih subjekata iz cijele BiH.

„Produženje roka za podnošenje prijave i plaćanje PDV-a bi u velikoj mjeri olakšalo poslovanje privrednim subjektima, a ne bi uticalo na procenat naplate PDV-a. Zato pozivamo delegate Doma naroda da podrže izmjene i dopune Zakona o PDV-u, usvojene u Zastupničkom domu i tako ispune obaveze preuzete prihvatanjem Reformske agende kojom je definirano donošenje zakonskih rješenja u cilju poboljšanja poslovnog ambijenta", kažu u UPFBiH.

Iz UPFBiH podsjećaju da bi bila prva mjera donesena na nivou države BiH s ciljem ublažavanja negativnih ekonomskih posljedica pandemije koronavirusa. Pomjeranjem roka ostvario bi se pozitivan uticaj na likvidnost privrednih subjekata.

Također ističu da je postojeći rok za podnošenje PDV prijave i plaćanje PDV-a do 10-og u mjesecu za prethodni mjesec suviše kratak. Podsjećaju da ukoliko porezni obaveznik ne podnese prijavu u zakonski predviđenom roku osim novčane kazne ima i druge štetne posljedice na poslovanje. Pomjeranjem roka plaćanja poslodavci će lakše moći

kontrolisati svoj cash-flow.

Iz UPFBiH podsjećaju delegate Doma naroda da je predloženo rješenje potpuno usklađeno sa Direktivom Vijeća Europske unije o zajedničkom sistemu poreza na dodanu vrijednost.



„Rok za podnošenje poreske prijave za PDV u BiH je najkraći u Europi. Najčešći rok je 20-30 dana, a u nekim zemljama je i duži. Zanima nas razlog zbog kojega taj rok ni u jednoj zemlji nije tako kratak kao u BiH?“, pitaju se poslodavci.

Osim toga, pomjeranjem roka za plaćanje PDV-a sa 10. na posljednji dan u mjesecu, došlo bi do usklađivanja sa odredbom o roku izvršenja novčanih obaveza između preduzetnika u poslovnim transakcijama koji iznosi do 60 dana u oba bh. entiteta. Iz UPFBiH pitaju zašto bi privredni subjekti trebali biti u podređenom položaju u odnosu na državu.

Na kraju, iz Udruženja poslodavaca FBiH ukazuju da predložene izmjene i dopune Zakona o PDV neće imati negativan uticaj na likvidnost budžeta BiH, entiteta i kantona.

Dom naroda PSBiH nije podržao dopunu Zakona o PDV-u



Uprkos nastojanjima Udruženja poslodavaca FBiH i pozivanju delegata da podrže izmjene i dopune Zakona o porezu na dodanu vrijednost BiH, u smislu produženja roka za podnošenje prijave i plaćanje PDV-a, delegati Doma narodna PSBiH nisu podržali dopunu Zakona o PDV-u.

Ranije je Zastupnički dom Parlamentarne skupštine BiH usvojio dopune tog zakonskog rješenja, koje je predložio zastupnik Denis Zvizdić, a po inicijativi Udruženja poslodavaca FBiH.

Udruženje će nastaviti sa svojim aktivnostima poboljšanja poslovnog ambijeta i kad je u pitanju Zakon o porezu na dodatnu vrijednost.

Inicijativu Udruženja možete pročitati [OVDJE](#).

Analizu možete pročitati [OVDJE](#).



UPFBiH: U FBiH blokirano više stotina miliona KM jer Dom naroda FBiH nije imenovao članove Komisije za vrijednosne papire FBiH

Udruženje poslodavaca Federacije Bosne i Hercegovine zahtijeva od nadležnih institucija hitno imenovanje članova Komisije za vrijednosne papire FBiH.

„Zbog nefunkcioniranja Komisije za vrijednosne papire FBiH, u ovome trenutku u FBiH je blokirano više stotina miliona KM. U situaciji kada zbog pandemije koronavirusa i katastrofalnih posljedica koje je ostavila na ekonomiju, privreda FBiH vapi za kapitalom, neodgovornošću političara i nedostatkom političke volje u FBiH je blokirano više stotina miliona KM“, kažu u UPFBiH.

Iz Udruženja poslodavaca BiH podsjećaju da je Komisija za vrijednosne papire FBiH najvažnija institucija na finansijskom tržištu Federacije BiH. Posebno ističu da Komisija već šest mjeseci ne obavlja svoju primarnu i zakonom definiranu funkciju, a to je zaštita investitora i nadzor tržišta i učesnika na tržištu, te nadzor emisije i prometa vrijednosnih papira, čime rizikuje nastanak materijalne štete privredi, bankama, dioničkim društvima, dioničarima i investitorima. U ovome trenutku više od stotinu zahtjeva pravnih subjekata čekaju konačne odluke koje može donijeti samo Komisija za vrijednosne papire FBiH.

„Komisija za vrijednosne papire Federacije BiH ne funkcioniše od novembra prošle godine zbog odlaska jednog od tri člana Upravnog odbora Komisije u penziju. Tokom proteklih šest mjeseci isključivo iz političkih razloga nije došlo do imenovanja novog saziva Komisije. I dok političari, podjednako iz vlasti i opozicije, zbog dnevnopolitičkih poena i partikularnih interesa odbijaju staviti imenovanja članova Komisije na dnevni red Doma naroda Parlamenta Federacije BiH i imenovati njene članove, kompletna

privreda FBiH trpi štetu", naglašavaju iz UPFBiH.

Osim što u ovome trenutku blokira više stotina miliona KM, neimenovanje članova Komisije za vrijednosne papire je i ozbiljna prepreka domaćim i stranim investitorima.

Uvažavaju ozbiljnost situacije u kojoj se zbog nefunkcioniranja Komisije nalaze investitori, dionička društva i dioničari u FBiH, a kojima se svakodnevno nanosi nemjerljiva šteta iz UPFBiH zahtjevaju da se odmah pronade efikasno rješenje sa ciljem pune funkcionalnosti rada Komisije za vrijednosne papire FBiH, kako bi ona konačno počela rješavati nagomilane predmete.

Zastupnički dom PSBiH prihvatio inicijativu UPFBiH za ukidanje obaveze plaćanja akcize na denaturirani etil alkohol

Po hitnom postupku na sjednici Zastupničkog doma Parlamentarne skupštine Bosne i Hercegovine usvojen je Prijedlog zakona o dopuni Zakona o akcizama u Bosni i Hercegovini, čiji su predlagači zastupnici Predrag Kojović, Mirjana Marinković-Lepić, Aida



Baručija i Damir Arnaut, a po inicijativi Udruženja poslodavaca FBiH koje je tražilo od nadležnih institucija ukidanje obaveze plaćanja akcize na denaturirani etil alkohol.

Udruženje poslodavaca Federacije Bosne i Hercegovine je u inicijativi podsjetilo da je u vrijeme pandemije Covida-19, kada je povećana potražnja za sredstvima za dezinfekciju i čišćenje, veoma bitno obezbijediti dovoljne količine sirovine za proizvodnju tih sredstava, te da predloženo ukidanje plaćanje ovih akciza je i zdravstvena mjera koja će doprinijet cjelokupnoj društvenoj zajednici i pomoći u borbi protiv širenja zaraze na području Bosne i Hercegovine.



Ukidanjem plaćanja akciza proširit će se asortiman proizvoda koji se mogu proizvoditi u Bosni i Hercegovini, a koji se trenutno uvoze iz drugih zemalja. Nova proizvodnja značila bi i otvaranje novih fabrika i proširenje postojećih, odnosno otvaranje novih radnih mjesta, veću potrošnju i veće punjenje budžeta, navodi se u inicijativi Udruženja.

Prema Zakonu o dopuni Zakona o akcizama u BiH u članu 1. dodaje se novi stav koji glasi: "Izuzete se odnosi na tarifne brojeve 2207 (Nedanaturisani etilni alkohol sa volumenskim sadržajem alkohola 80% vol i većim; etilni alkohol i ostali alkoholi, denaturisani, bilo koje jačine), 2207 10 00 00 (Nedanaturisani etilni alkohol sa volumenskim sadržajem alkohola 80% vol i većim) i 2207 20 00 00 (Etilni alkohol i ostali alkoholi, denaturisani, bilo koje jačine, za koje se ne naplaćuje akciza u 2020. godini)".

IO UPFBiH: Hitno donijeti izmjene i dopune Zakona o radu FBiH i novi set mjera za pomoć privredi nakon krize



Izvršni odbor Udruženja poslodavaca Federacije Bosne i Hercegovine insistira na hitnom donošenju izmjena i dopuna Zakona o radu FBiH, kako bi se kompanijama u FBiH omogućilo neometano funkcioniranje tokom i nakon trajanja krize izazavane pandemijom koronavirusa.

Izvršni odbor UPFBiH je podržao donošenje izmjena i dopuna Zakona o radu u tekstu koji je predložila Vlada FBiH, a zatraženo je da Vlada FBiH u što kraćem roku istovremeno sa izmjenama Zakona o radu u parlamentarnu proceduru uputiti i izmjene Zakona o vijeću zaposlenika FBiH.

Na sjednici je istaknuto da IO UPFBiH nije u potpunosti zadovoljan sa rješenjima Zakona o ublažavanju negativnih ekonomskih posljedica, ali ona predstavljaju prvi korak u pomoći privredi. Od Vlade FBiH je zatraženo da što prije pripremi naredni, treći

set mjera koji bi se odnosio na podršku u periodu nakon proglašenja prestanka stanja nesreće izazvane COVID-19. Naglašeno je da je situacija u privredi izuzetno teška i da bez podrške nadležnih institucija same kompanije i privrednici neće moći sačuvati radna mjesta i privredu. U vezi sa navedenim IO UPFBiH će ubrzo pripremiti i nadležnima dostaviti svoj prijedlog trećeg seta mjera za ublažavanje negativnih posljedica pandemije koronavirusa na privredu.



Članovi Izvršnog odbora Udruženja poslodavaca FBiH ukazali su na brojne probleme koji se tiču provedbenih akata kada je u pitanju primjena Zakona o ublažavanju negativnih efekata. Neka od otvorenih pitanja koja ostavljaju mogućnost za različita tumačenja je uslov da kompanije mogu ostvariti subvencije uz uslov da su isplatile doprinose za februar ove godine, ali se ne navodi datum do kojega su doprinosi trebali biti uplaćeni. Kako se u zakonu ne spominju doprinosi za mart, niti druge poreske obaveze otvoreno je pitanje da li će prepreka za ostvarivanje subvencije biti neuplaćeni porezi i doprinosi za mart, ali i mnoga druga pitanja koja su poslodavci dostavili UPFBiH. Zaključeno da o svim otvorenim pitanjima provedbe ovog Zakona IO UPFBiH zatraži zvaničan stav Porezne uprave FBiH.

Udruženje zatražilo objašnjenja u vezi podnošenja zahtjeva za subvencioniranje doprinosa

Kako je istaknuto na sjednici Izvršnog odbora, Udruženju poslodavaca u FBiH se obratio veliki broj članica vezano za primjenu Zakona o ublažavanju negativnih ekonomskih posljedica, jer su se pojavile brojne nejasnoće i dileme u vezi sa podnošenjem zahtjeva za subvencioniranje kao i dokumentacije i obrazaca koji se dostavljaju uz zahtjev.



S tim u vezi, Udruženje poslodavaca FBiH je Poreznoj upravi FBiH i Ministarstvu finansija FBiH 13. maja poslalo upite na koje se hitno traži odgovor, a u cilju ispravnog postupanja prilikom podnošenja zahtjeva.

Tako se, između ostalog, traži odgovor na pitanje da li su se doprinosi za februar morali isplatiti do datuma stupanja na snagu Zakona ili do datuma podnošenja zahtjeva za aplikaciju subvencije, da li je smetnja za podnošenje zahtjeva postojanje duga za plaćanje doprinosa za mart, do kada treba izmiriti sve obaveze za mart da bi kompanija mogla aplicirati, na koji način će se vršiti ispata doprinosa za april, te da li je prepreka za apliciranje onih poslodavaca koji su već isplatili neto plaće i pune doprinose na neto plaće.

Porezna uprava FBiH objavila uputstvo o načinu podnošenja zahtjeva i potrebnoj dokumentaciji za subvencioniranje doprinosa

Porezna uprava Federacije BiH shodno Zakonu o ublažavanju negativnih ekonomskih posljedica (Službene novine FBiH, br. 28/20) sačinila i na web stranici Porezne uprave Federacije BiH objavila:


- [Uputstvo o načinu podnošenja zahtjeva i potrebnoj dokumentaciji za subvencioniranje doprinosa,](#)
- [Zahtjev za subvencioniranje doprinosa za obavezna osiguranja - Obrazac – ZSD](#)
- [Uputstvo za popunjavanje Zahtjeva za subvencioniranje doprinosa za obavezna osiguranja Obrazac – ZSD](#)

Navedena Uputstva i Zahtjev se nalaze na web stranici Porezne uprave Federacije BiH u dijelu Obrasci i Zakoni. Obrazac - ZSD je objavljen u PDF formatu koji je editabilan, tako da se isti može popuniti u elektronskom obliku, odštampati, potpisati i ovjeriti pečatom obveznika ili se može popuniti i ručno, odštampati i dostaviti nadležnoj poreznoj ispostavi prema sjedištu podnosioca zahtjeva.

Porezni obveznici imaju pravo na subvencioniranje doprinosa ako ispunjavaju sljedeća dva uslova, i to:

- da su izmirili obaveze za doprinose i porez na dohodak uz isplaćene plaće zaključno sa februarom 2020. godine
- da imaju pad ostvarenog prometa 20% i više u odnosu na ostvoreni promet u istom mjesecu 2019. godine.

Preduslov za uspješnu obradu zahtjeva tj. Obrasca – ZSD je da su plaćene obaveze po osnovu doprinosa i poreza na dohodak zaključno sa mjesecom 02/2020. godine i da su podneseni ispravni mjesečni obrasci MIP-1023, 2001/2001-A ili 2002/2002-A za mjesec za koji se traži subvencija.



Porezna uprava je pozvala porezne obveznike koji nisu izvršili uplatu poreza i doprinosa na isplaćene plaće zaključno sa 02/2020 godine, da to učine prije podnošenja zahtjeva i tako uz uslov pada prometa od 20 i više % ostvare pravo na subvenciju. Porezni obveznici koji ne izvrše uplatu doprinosa zaključno sa 02/2020. godine neće ostvariti pravo na subvenciju i ako imaju pad prihoda od 20 i više %.

Rok za podnošenje zahtjeva za subvencioniranje doprinosa za socijalno osiguranje za 04/2020. godine je 29.05.2020. godine, a za naredne mjesec do desetog u tekućem za prethodni mjesec.

Predstavnici UPFBiH i Porezne uprave FBiH o olakšavanju komplikovanih procedura za ostvarivanje prava na subvenciju

Predstavnici Udruženja poslodavaca FBiH i Porezne uprave FBiH su 27. maja 2020. godine održali sastanak u vezi primjene Zakona o ublažavanju negativnih ekonomskih posljedica.

Sastanak se održao na zahtjev Udruženja, a kako bi razgovarali o olakšavanju komplikovanih procedura za ostvarivanje prava na subvenciju i nedoumicama u vezi uputstva o načinu podnošenja poreznih prijava i zahtjeva za subvencioniranje doprinosa.

Poslodavci su ukazali na brojne probleme koji se tiču provedbenih akata kada je u pitanju primjena Zakona o ublažavanju negativnih efekata. Neka od otvorenih pitanja koja ostavljaju mogućnost za različita tumačenja je i pitanje šta je sa firmama koje su registrovane u jednom bh. entitetu, a poslovne jedinice im se nalaze u drugom bh. entitu, da li kompanije koje zapošljavaju veliki broj radnika podnose zbirnu ili pojedinačne zahtjeve, te šta je sa novoosnovanim kompanijama, odnosno onima koje su registrovane poslije 01. maja.



UPFBiH zahtjeva ukidanje samoizolacije po povratku sa službenih putovanja i stranim državljanima koji zbog posla borave u BiH

Udruženje poslodavaca FBiH uputilo je Federalnom štabu civilne zaštite zahtjev za hitnu izmjenu naredbi 12-40-6-148-144/20 od 24.04.2020. godine, 12-40-6-148-144-1/20 od 29.04.2020. godine i 12-40-6-148-144-2/20 od 08.05.2020. godine, u smislu ukidanja 14-dnevne samoizolacije. Udruženje poslodavaca traži da su od Naredbe izuzeti državljani BiH koji moraju da idu na službena putovanja,

odnosno oni koji posjeduju putni nalog, poziv na poslovni sastanak odnosno neki drugi dokument kojim dokazuje da je bio izvan BiH zbog poslovnih aktivnosti i strani državljani koji u svrhu realizacije poslovnih aktivnosti sa domaćim kompanijama imaju potrebu da putuju u BiH.

Iz naredbi je neophodno izuzeti i strane državljane koji u svrhu realizacije poslovnih aktivnosti sa domaćim kompanijama imaju potrebu da putuju u BiH. Sve države u regionu su već preduzele aktivnosti po ovom pitanju.

Prihvatanje prijedloga dovest će do normalnog funkcioniranja kompanija i nastavka proizvodnih aktivnosti, jer su mnoge domaće kompanije prisiljene da zaustave svoje aktivnosti uslijed kvara na proizvodnim pogonima, a koji se mogu popraviti jedino dolaskom vanjskih servisera. Također, očuvat će se broj radnih mjesta jer brojne domaće kompanije zapošljavaju radnike iz susjednih država, međutim trenutno nisu u mogućnosti da organiziraju rad tih radnika u prostorijama kompanije, kao i normalno funkcioniranja Upravnih i Nadzornih odbora, jer su u većini kompanija u Upravama društva strani državljani. Usvajanjem prijedloga bi se omogućio i nastavak rada brojnih započelih projekata i realizacija ugovora s konzultantima i dobavljačima koji su trenutno na čekanju.


UPFBiH poziva bh. vlasti da hitno stvore uvjete koji će omogućiti službena putovanja u i iz BiH

Iz Udruženja poslodavaca Federacije Bosne i Hercegovine se od nadležnih institucija u Bosni i Hercegovini traži hitno stvaranje uslova za ukidanje samoizolacije u trajanju od 14 dana za sve državljane BiH koji moraju ići na službena putovanja, a koji posjeduju putni nalog, poziv na poslovni sastanak ili neki drugi dokument kojim dokazuje da je bio izvan BiH zbog poslovnih aktivnosti. Inicijativa se odnosi i na strane državljane koji u svrhu realizacije poslovnih aktivnosti sa domaćim kompanijama imaju potrebu da doputuju u BiH.



„Fraze poput 'još se nisu stekli uslovi' koje možemo čuti od zvaničnih predstavnika vlasti su prazne rečenice i još jedan izgovor da ne urade ništa. Zahtijevamo da nam kažu koji su to uslovi koji se trebaju steći i da odmah, hitno pristupe stvaranju tih uslova", navode iz Udruženja poslodavaca FBiH.


Iz UPFBiH naglašavaju da su sve države regiona već preduzele aktivnosti u vezi sa službenim putovanjima. Tako je, naprimjer, Hrvatska donijela Odluku kojom je



dozvoljen ulazak strancima koji posjeduju poziv privrednog subjekta u Hrvatsku ili poziv na poslovni sastanak. Istovjetna je situacija i u Srbiji.

„Prema tome, ako druge zemlje u kojima su posljedice pandemije koronavirusa daleko izraženije nego u BiH, spremne primiti bh. državljane pod jasno definiranim uslovima i bez karantina, ne vidimo nikakav razlog za lažno dušebrižništvo predstavnika bh. vlasti kojim ograničavaju pravo na poslovna putovanja ni bh. državljanima, a ni strancima", naglašavaju iz UPFBiH.

Iz UPFBiH podsjećaju da smo u jeku pandemije koronavirusa imali priliku svjedočiti službenim putovanjima bh. političara u inostranstvo, koji nakon povratka u zemlju nisu poštovali propisanu odredbu o obaveznoj samoizolaciji u trajanju od 14 dana.



„Smirivanjem pandemije koronavirusa neophodno je poduzeti sve kako bi se sačuvala radna mjesta i privredni tokovi u zemlji. Privreda u FBiH je na koljenima i umjesto da pomognu njen oporavak pravovremenim i efikasnim odlukama, predstavnici bh. vlasti iz lijenosti, neznanja i ponajprije nehtijenja se kriju iza besmislenih floskula i još besmislenijih odluka", navode iz UPFiH.

Prihvatanjem prijedloga Udruženja poslodavaca Federacije BiH omogućit će se pokretanje privrednih aktivnosti, obnavljanje postojećih ugovora sa inostranim kompanijama, osiguranje novih ugovora i poslova za kompanije, opstanak kompanija na inostranom tržištu, kao i osiguranje repromaterijala neophodnih za rad bh. kompanija. Na taj način spasit će se brojne kompanije i spriječiti se masovno otpuštanje radnika, a to ujedno znači i očuvanje budžeta i vanbudžetskih fondova.

Objavljena Odluka o dopunama Odluke o propisivanju dodatnih uslova za ulazak stranaca u BiH

Vijeće ministara BiH, na prijedlog Ministarstva sigurnosti BiH je donijelo Odluku o dopunama Odluke o propisivanju dodatnih uvjeta za ulazak stranaca u Bosnu i Hercegovinu, čime se poslovnim ljudima omogućava ulazak u BiH. Odlukom se omogućavaju ulazak i boravak strancu koji u Bosnu i Hercegovinu ulazi zbog poslovnih obveza, pod uvjetom da posjeduje pozivno pismo pravne osobe iz Bosne i Hercegovine koja ga angažira u BiH i potvrdu o negativnom testu na virus SARS-CoV-2 ovlaštenog laboratorija, ne stariju od 48 sati od trenutka ulaska.



Odluka je donijeta na inicijativu Udruženja poslodavaca FBiH, a u cilju omogućavanja normalnog

funkcioniranja kompanija i nastavka proizvodnih aktivnosti, obnavljanje postojećih ugovora sa inostranim kompanijama, obezbjeđivanje novih ugovora i poslova za kompanije, opstanak kompanija na inostranom tržištu rada, kao i obezbjeđivanje repromaterijala koji je neophodan za rad.

Odluka o dopunama Odluke o propisivanju dodatnih uslova za ulazak stranaca u Bosnu i Hercegovinu objavljena je u Službenom glasniku BiH broj 29/20 od 23. maja 2020. godine i možete je preuzeti [OVDJE](#).



UPFBiH uputilo zahtjev za izmjenu Pravilnika o izmjeni i dopuni pravilnika o registriranju vozila

Udruženje poslodavaca FBiH uputilo je Ministarstvu prometa i komunikacija BiH zahtjev za izmjenu Pravilnika o registriranju vozila.

Izmjene Pravilnika koje predlaže Udruženje imaju za cilj da se produži rok važenja registracije za vozila koja se ne koriste u saobraćaju do prestanka stanja izazvanog pandemijom korona virusa.

Udruženje je stava da se vlasnicima vozila za vrijeme trajanja produžetka roka važenja registracije treba omogućiti da nisu obavezni odjaviti vozilo i vratiti registarske tablice. Prema prijedlogu registraciju vozila vlasnici bi bili dužni su obaviti u roku 30 dana od dana prestanka stanja izazvanog pandemijom koronavirusa (COVID-19). Također vlasnicima autobusa i teretnih vozila potrebno je omogućiti da ponovnu registraciju obave najkasnije do 90 dana od dana prestanka stanja izazvanog pandemijom koronavirusa (COVID-19).



Poslodavci iz oblasti prometa su u velikoj mjeri izloženi problemima i zastoja u poslovanju zbog korona virusa. Već od januara mnoge kompanije za prevoz putnika ne obavljaju svoju djelatnost. Federali štaba civilne zaštite Federacije BiH, polovinom marta 2020. godine, je izdao naredbe kojima je zabranjeno vršenja javnog linijskog

autobusnog prijevoza putnika. Dakle, u prevoznim kompanijama autobusi se ne upotrebljavaju već od marta a imajući u vidu da je zbog korona virusa oslabila kupovna moć stanovništva, strah od putovanja u sredstvima javnog prijevoza zbog zaraze, smanjena tražnja za turističkim uslugama i nakon prestanka stanja nereće prevoznici će i dalje biti u problemima.

[Izmjene Pravilnika koje predlaže Udruženje](#)

Objavljen Pravilnik o izmjeni i dopuni Pravilnika o registriranju vozila

Nakon urgencije Udruženja poslodavaca FBiH, Ministarstvo komunikacija i prometa BiH donijelo je Pravilnik o izmjeni i dopuni Pravilnika o registriranju vozila.

Udruženje poslodavaca FBiH još je u martu poslalo zahtjev Minisarstvu za izmjenu pomenutog pravilnika, a potom i urgenciju, kako bi se izmjenama produžio rok važenja registracije za vozila koja se ne koriste u saobraćaju do prestanka stanja izazvanog pandemijom korona virusa.



Ministarstvo je zahtjev Udruženja proširilo te je u Pravilnik dodat stav u kojem stoji da se "za vozila čija je registracija istekla nakon 16.03.2020. godine, zahtjev za produženje registracije vozila može podnijeti najkasnije 90 dana od dana prestanka stanja prirodne ili druge nesreće na teritoriji BiH, a ukoliko se zahtjev za produženje registracije vozila


ne podnese do roka predviđenog ovim članom, vozilo se službeno odjavljuje iz evidencije registriranih vozila a vlasnik vozila dužan je vratiti registarske tablice nadležnom organu u roku od osam dana". U Službenom glasniku BiH 29/20 od 23. maja 2020. godine, objavljen je [Pravilnik o izmjeni i dopuni Pravilnika o registriranju vozila](#).

Upućen zahtjev za privremenu izmjenu uslova održavanja javnog linijskog prijevozu putnika



Pojavom pandemije Covida-19 polovinom marta 2020. izdate su naredbe kojima je zabranjen rad određenih privrednih subjekata, obrazovnih institucija kao i državnih organa, kao i kretanja stanovništva i vršenje javnog linijskog autobusnog prijevoza putnika. Zbog donesenih mjera primjetan je pad privredne aktivnosti u svim oblastima privređivanja, prestanak rada pojedinih privrednih društava i društvenih organizacija, što će rezultirati smanjenjem broja radnih mjesta, slabljenjem životnog standarda stanovništva i smanjenjem putovanja putnika.

Navedena pojava ima karakter „više sile“ te u skladu sa članom 32. stav 2. Zakona o cestovnom prijevozu FBiH obustava prijevoza odnosno nevršenje prijevoza u skladu sa registriranim redom vožnje je opravdana. Međutim, prevoznici se već nalaze u situaciji izmijenjenih privrednih i tržišnih uslova, odnosno, smanjena je tražnja za uslugama prijevoza putnika zbog oslabljene kupovne moći stanovništva, straha od putovanja, smanjenja potražnje za turističkim uslugama i sl.



S tim u vezi, nakon ponovnog započinjanja vršenja prevoza, vjerovatno u trajanju ne kraćem od šest mjeseci, na određenim linijama neće biti ekonomski opravdano vršiti prijevoz na svim registriranim polascima, a moguće da neke linija će u cijelosti biti nerentabilne.

Po prestanku razloga „više sile“ član 27. stav 1. Zakon o cestovnom prijevozu predviđa održavanje javnog linijskog prijevoza putnika u skladu sa registriranim redom vožnje, a u slučaju kršenja istog predviđa sankcije u smislu brisanja polazaka ili cijelog reda vožnje, definisano članom 33. stav 2 i 3 istog zakona. Iz gore nevedenih razloga, veliki broj prijevoznika će, ne svojom krivicom i pored želje da nastavi raditi kao i prije epidemije, doći u situaciju da su mu određeni polasci ili cijele linije ne rentabilne te da će mu u slučaju neurednog održavanja, isti biti brisani, mada bi se, nakon određenog perioda, mogla ponovo ukazati potreba za održavanjem tih polazaka ili linija.

Stoga, Udruženje je uputilo Ministarstvu prometa i komunikacija FBiH zahtjev za privremenu izmjenu uslova održavanja javnog linijskog prevoza putnika, odnosno da se na minilano šest mjeseci nakon ponovnog uspostavljanja mogućnosti vršenja prijevoza, dozvoli stavljanje određenih polazaka ili cijelih linija u stanje „mirovanja“ tj. da se i taj period smatra periodom vanrednog slučaja i da se dozvoli nevršenje prijevoza u skladu sa registriranim redom vožnje istih, bez prijetnje i bojazni da će isti biti od strane nadležnih organa brisani.

Kako postoji zakonski osnov definisan Pravilnikom o načinu, uvjetima, postupku i kriterijima utvrđivanja i trajanja privremenog obustavljanja održavanja polaska ili reda vožnje usljed više sile ili vanrednog slučaja u cestovnom prometu Udruženje predlaže da se isti primijeni u periodu od prestanka zabrane obavljanja javnog linijskog prijevoza putnika pa do kraja 2020. godine sa mogućnošću produžena u slučaju da se opća privredna situacija ne popravi do tada.



Izmijenjen Pravilnik o primjeni zakona o PDV-u na inicijativu UPFBiH

Upravni odbor Uprave za indirektno oporezivanje BiH usvojio je na sjednici održanoj 18.05.2020. godine Pravilnik o izmjenama i dopunama Pravilnika o primjeni zakona o PDV-u. Izmjene i dopune usvojene su na inicijativu Udruženja poslodavaca FBiH.

Pravilnikom o izmjenama i dopunama Pravilnika o primjeni Zakona o porezu na dodatu vrijednost omogućava se povrat PDV stranim poreskim obaveznicima kao i u drugim europskim zemljama i uklanjaju se ograničenja koja trenutno imaju bh. poreski obaveznici u državama koje trenutno primjenjuju načelo uzajamnosti ili reciprociteta (Hrvatska, Slovenija, Švajcarska, Italija, Mađarska, Turska, Češka i druge).

UPFBiH uputilo urgenciju za otvaranje GP Izačić

Udruženje poslodavaca FBiH uputilo je 14. maja Vijeću ministara BiH, Ministarstvu vanjskih poslova BiH, Ministarstvu sigurnosti BiH i Ministarstvu prometa i komunikacija BiH urgenciju za otvaranje graničnog prelaza Izačić.

Kako se navodi u dopisu, a prema informacijama sa kojima raspolaže Udruženje poslodavaca, zbog neotvaranja graničnog prelaza Izačić brojne kompanije u BiH i dalje se susreću sa velikim problemima. U dopisu se traži hitno reagovanje i obraćenje diplomatsko-konzularnim putem nadležnim institucijama Republike Hrvatske za otvaranje GP Izačić, s ciljem cilju očuvanja bh. privrede i radnih mjesta, kao i sprečavanja masovnog otpuštenja, jer privrednici zatvaranjem pomenutog prelaza trpe ogromne štete koje se mogu mjeriti u milionima KM.

UPFBiH poziva banke da ne povećavaju kamate privrednim društvima

Udruženje poslodavaca FBiH posljednjih dana obaviješteno je od određenog broja članica da su im poslovne banke sa kojima sarađuju najavile povećanje kamata u narednom periodu. U Udruženju poslodavaca FBiH smatraju da je, ukoliko su ove informacije tačne pa čak i ukoliko je ta opcija navedena u ugovorima koje banke imaju sa privrednim društvima, povećanje kamata sasvim neprimjereno.

„Najava povećanja kamata na postojeće kredite kompanijama je neprihvatljiva i nekorektna. U uslovima kada kompletna svjetska pa tako i bh. privreda trpi stravične posljedice krize izazvane



pandemijom koronavirusa, pokušaj pojedinih banaka da povećanjem kamata sačuvaju ionako visoke bankarske profite, u potpunosti zanemarujući interese klijenata, smatramo neprihvatljivim", ističu iz Udruženja poslodavaca FBiH.

„Od banaka u narednom periodu očekujemo da pokažu malo više društvene odgovornosti u smislu očuvanja radnih mjesta i privrednih subjekata koji su njihovi najznačajniji klijenti. Također očekujemo da u prvom planu poslovanja banaka bude opštedruštveni interes, a ne briga za vlastiti profit", naglašavaju iz UPFBiH.

Iz UPFBiH će pratiti situaciju sa najavljenim povećanjem kamata te ukoliko do toga dođe, bit će zatražena intervencija nadležnih institucija i o tome će obavijestiti javnost.



Inicijativa UPFBiH za donošenje Programa mjera za očuvanje radnih mjesta

Udruženje poslodavaca FBiH uputilo je Federalnom zavodu za zapošljavanje inicijativu za donošenje Programa mjera za očuvanje radnih mjesta s ciljem očuvanja radnih mjesta kod poslodavaca kojima je zbog pandemije korona virusa (COVID 19) narušena privredna aktivnost.


Naime, u inicijativi se traži donošenje Programa mjera za očuvanje radnih mjesta koji podrazumijeva isplatu naknade u visini minimalne plaće radnicima.

Korisnici Programa bili bi poslodavci registrirani u Federaciji BiH kod kojih je zbog negativnih ekonomskih posljedica izazvanih korona virusom došlo do pada broja zaposlenih u periodu od 16.03.2020. godine do 01.05.2020. godine, a Program bi se odnosio na nezaposlene osobe koje su se zbog otkaza u periodu 16.03.2020. godine do 01.05.2020. godine prijavile na evidenciju kantonalnih službi za zapošljavanje u FBiH i na osnovu prijave ostvarile pravo na novčanu naknadu.

Program bi započeo sa realizacijom od 01.06.2020. godine i primjenjivao bi se do kraja 2020. godine.

Donošenje Programa, koji je predložio Udruženje, je u interesu radnika, poslodavaca, ali i Federalnog zavoda za zapošljavanje, a rezultirat će vraćanjem otpuštenih radnika na posao, sprečavanjem davanja novih otkaza, očuvanjem opstanka mnogih kompanija u FBiH i nastavak nesmetanog obavljanja privrednih aktivnosti. Naime, prema Zakonu o posredovanju u zapošljavanju i socijalnoj sigurnosti nezaposlenih osoba („Službene novine FBiH“, broj: 41/01, 22/05, 9/08) nezaposlena osoba ima pravo na novčanu

naknadu po prestanku radnog odnosa. Visina novčane naknade je 40% prosječne neto plaće u FBiH što je otprilike oko 400 KM. Obzirom da već postoji obaveza isplate novčane naknade, prijedlog Udruženja je da se novčana naknada preusmjeri poslodavcima koji bi vratili otpuštene radnike na posao. Minimalna plaća je oko 406 KM, tako da ne postoji znatna razlika između naknade i onoga što Udruženje predlaže.



Ovim bi se radnici skinuli sa tereta države. Radnici po osnovu prijave na evidenciju službe za zapošljavanje ostvaruju pravo na zdravstveno osiguranje, kartu za prevoz i na novčanu naknadu. Ukoliko bi se prihvatio prijedlog Udruženja radnik bi se ponovo zaposlio kod poslodavca, a Zavod bi samo jedan određeni vremenski period subvencionirao minimalnu plaću. Nakon proteka tog perioda, a ujedno i po prestanku vanrednih okolnosti, poslodavci bi svoje poslovanje vraćali u normalne tokove, nastavili svoje privredne aktivnosti i ponovo stekli uslove za isplatu plaća i ostalih obaveza prema radnicima. Dakle, radnici bi ostali kod poslodavaca i ne bi bili na teretu države, odnosno sve doprinose bi uplaćivao poslodavac. U suprotnom, ostaje pitanje kada bi osobe koje su dobile otkaze ponovo pronašle posao i koliko bi trajao njihov boravak na evidenciji službi za zapošljavanje.

Predstavnici UPFBiH i Ministarstva finansija FBiH o problemima koji su se javili prilikom podnošenja zahtjeva za subvenciju doprinosa i prilikom prikupljanja tenderske dokumentacije



Predsjednik i direktor Udruženja poslodavaca FBiH Adnan Smailbegović i Mladen Pandurević, održali su 29. maja 2020. godine sastanak sa pomoćnicima ministarstva finansija FBiH Mirom Bradarom i Medinom Dudo, a kako bi razgovarali o Uputstvo o načinu podnošenja zahtjeva i potrebnoj

dokumentaciji za subvencioniranje doprinosa, odnosno o problemima koji su se javili prilikom podnošenja zahtjeva.

Poslodavci su istakli pitanje utvrđivanje pada prihoda od 20 posto u odnosu na isti mjesec prethodne godine. Naime, određeni poslodavci, da bi sačuvali radna mjesta i održali likvidnost, prodavali su imovinu, pa se pad prihoda ne može iskazati.


Poslodavci su također istakli problem ponošenja potvrde o plaćenim porezima prilikom prikupljanja tenderske dokumentacije, jer pojedini poslodavci nisu platili akontaciju na porez na dobit kako nije istakao rok obaveze plaćanja.

Udruženje poslodavaca FBiH će se pismeno obratiti Ministarstvu kako bi se ovi, ali i ostali problemi po pitanju ostvarivanju prava na subvenciju riješili, zaključeno je na sastanku.

Održana sjednica UO Grupacije poslodavaca SBK pri UPFBiH

Na sjednici Upravnog odbora Grupacije poslodavaca SBK/KSB pri UPFBiH održanoj 06. maja 2020. godine razmatrana je aktuelna situacija u vezi pandemije Covida-19 i uticaja iste na privredu kantona, te urađena analiza do sada provedenih aktivnosti u vezi pomenutog problema i određivanje pravaca buduće djelovanja Grupacije.

Članovi Upravnog odbora i ostali gosti konstatovali su da su uposlenici u njihovim kompanijama apsolutni interes, te da nisu raskidali ugovore o radu, već su im omogućili korištenje čitavog godišnjeg odmora za 2020. godinu, preraspodjelu radnog vremena, te plate za vrijeme čekanja.



Upravni odbor je konstatovao da je stanje poslovanja u svim privrednim subjektima izuzetno teško, a naročito u djelatnostima kojima je zabranjen rad kao što je ugostiteljstvo, turizam, mali obrti, određene trgovine, uslužne djelatnosti itd. Procjenjuje se da je u preduzećima srednje veličine

(konfekcija, metalska i mašinska industrija, drvena industrija i namještaj, obuća, građevina, hemijska industrija, saobraćaj, itd.) više od 50 posto proizvodnja i promet smanjeni, a u pojedinim i 80 posto.

Kako još uvijek nije bilo nikakve konkretne podrške poslovnim subjektima i njihovim uposlenicima, te je prisutna neizvjesnost, kako kod uposlenika tako i poslodavaca,

poslodavci od nadležnih državnih organa očekuju podršku i pomoć za uposlenike u vidu nadoknade (subvencioniranja) doprinosa za plaće i obezbjeđenja minimalne plaće za poslovne subjekte kojima je zabranjen rad i one subjekte koji imaju pad poslovne aktivnosti za 20 i više posto.

Poslodavci također insistiraju da se odmah oslobode plaćanja parafiskalnih nameta, najmanje do kraja tekuće godine, te da se u tom periodu okonča započeta aktivnost kantonalne vlasti i poslodavaca za stvaranje uvjeta i potpuno ukidanje nepotrebnih parafiskalnih nameta.

Upravi odbor je predložio da se po hitnom postupku, a na osnovu tačnih podataka i procjene stručnjaka, ublaže mjere zabrane, a određene potpuno ukinu. Ovo se odnosi, prije svega, na mjere koje će omogućiti jednostavniju prohodnost roba, ljudi, prekograničnog poslovanja, transporta i roba i sl.



Članovi Upravnog odbora su mišljenja da je neophodno, zbog izuzetno ozbiljne situacije, u najkraćem mogućem roku održati sastanak na kojem bi prisustvovali predstavnici kantonalne Vlade, zakonodavne i sudske vlasti, Porezne uprave, Fonda zdravstvenog osiguranja i Grupacije poslodavaca SBK pri UPFBiH.

Ovi zaključci dostavljeni su Kriznom štabu Ministarstva privrede SBK, Ministarstvu privrede SBK i Vladi SBK.

Održana sjednica Upravnog odbora Grupacije poslodavaca ZDK pri UPFBiH



Na sjednici Upravnog odbora Grupacije poslodavaca Zeničko-dobojskog kantona pri UPFBiH članovi su razmatrali upite članica, poteškoće sa kojima se susreću te primjedbe i sugestije poslodavaca vezano za prevazilaženje aktuelne situacije uzrokovane pandemijom Covida-19.

Izvršena je i evaluacija preduzetih mjera iz segmenta privrede s ciljem saniranja posljedica izazvanih pandemijom te će Upravni odbor Vladi ZDK na sjednici Ekonomsko-socijalnog vijeća pokrenuti pitanja koja se tiču broja otpuštenih radnika i onih koji su samoinicijativno napustili posao, kao i

subvencija firmama kojima je zabranjen rad.

Upravni odbor će, zaključeno je, na ESV-u pokrenuti i nova pitanja, između ostalog pitanje beskatnatnih kredita i jednostavnijih procedura programa poticaja zapošljavanja osoba koje su na birou.


ESV ZDK: Olakšana isplata subvencije plaće za april

Ekonomsko socijalno vijeće za područje Zeničko-dobojskog kantona na sjednici održanoj 06. maja 2020. godine analiziralo je realizaciju interventnih mjera Vlade ZDK za ublažavanje posljedica pandemije koronavirusa u privredi, sa težištem na završeni konkurs za dodjelu subvencije dijela plaće za mart privrednim subjektima kojima je zabranjen rad naredbama Federalnog štaba civilne zaštite i Kriznog štaba FBiH, a na koji je pristiglo 2.000 prijava fizičkih i pravnih lica.

Već je donesena prva odluka o odobravanju sredstava prvoj grupi aplikanta kojima će za mjesec mart biti isplaćena subvencija u visini 50 posto minimalne plaće za mart, a nova u nizu odluka o odobravanju subvencije bit će donesena već u petak. Planirano je da se iduće sedmice raspiše javni poziv za isplatu punog iznos minimalne plaće za mjesec april.



"Dogovorili smo se da javni poziv za april dodatno modifikujemo na način da poslovni subjekti dobiju određena grant sredstva za finansiranje plaće, ali da oni koji su već isplatili plaću za april to dokažu, a oni koji nisu isplatili plaću da u roku od osam dana



opravdaju sredstva. To će ubrzati proces isplate, a s druge strane ćemo doći do brzih rješenja”, rekao je premijer Mirza Ganić, dodajući da je dogovoreno da se korištenje subvencije za april omogući i auto-školama s obzirom da je naknadno, nakon konsultacija sa FUCZ, utvrđeno da je i njima bio zabranjen rad.

Ministar za privredu Zlatko Jelić potvrdio je da pravna i fizička lica kojima je odobrena subvencija za mart neće morati dostavljati novu dokumentaciju za april, nego će biti dužni podnijeti samo zahtjev za odobravanje subvencije.

“Uslov za dodjelu subvencije je da subjekti nisu otpuštali radnike u periodu od 29.02. do 30.04. te da su izmirili doprinose zaključno sa 29.02. ove godine. Ostali smo pri tome da će ministarstvo službenim putem nastaviti provjeravati podatke kod Porezne uprave i Uprave za indirektno oporezivanje, tako da nećemo finansijski opteretiti pravna i fizička lica”, rekao je Jelić.

Socijalni partneri pozitivno su ocijenili dosadašnje interventne mjere Ministarstva za privredu i Vlade ZDK te istakli važnost postupanja u skladu sa važećim zakonskim propisima. ESV ZDK očekuje od lokalnih zajednica da se uključe u kreiranje programa podrške privredi, jer je evidentno da su dosadašnje mjere nedovoljne ili ih uopće nisu poduzimale, tako što će pomoći znatno manjem broju subjekata uslužnih djelatnosti, obrtnika i zanatlija, koji nisu obuhvaćeni mjerama viših nivoa vlasti zbog neispunjavanja definisanih kriterija.

Ministarstvo za privredu je zaduženo da osmisli novi program podsticaja u skladu s mogućnostima, a kako bi se pružila i dodatna podrška privredi u ovom kantonu.



UDRUŽENJE POSLODAVACA

UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba